

乾隆杭州府志

杭州府志卷八十五

人物 三 武功

漢

輟終古錢塘人元封元年天子遣樓船將軍入東越東越使徇北將軍守武林敗樓船軍數校尉殺長吏樓船將軍率輟終古斬徇北將軍爲禦兒侯

史記東越列傳

按聶氏錢塘志無傳但於名下注漢人斬樓船將軍正義曰輟姓終古名前漢書輟作檣又長吏作長史樓船將軍率輟終古作樓船軍卒檣終古終古以軍卒克建奇勲故以侯封褒之文義甚明聶氏以爲斬樓船將軍

誤矣

孫堅字文臺富春人少爲縣吏年十七與父共載船至錢唐會海賊胡玉等從匏里上掠取賈人財物方于岸上分之堅行操刀上岸以手東西指麾若分部人兵以羅遮賊狀賊望見以爲官兵捕之卽委財物散走堅追斬得一級以還由是顯聞府召署假尉會稽妖賊許昌起于句章與其子韶扇動諸縣衆以萬數堅以郡司馬募召精勇得千餘人與州郡合討破之詔書除堅鹽漬丞數歲徙盱眙丞又徙下邳丞中平元年黃巾賊帥張角起于魏郡中郎將朱儁表堅爲佐軍司馬與儁并力奮擊所向無前汝穎賊

困迫走保宛城堅身當一面登城先入衆乃蟻附遂大破之上拜堅別部司馬邊章韓遂作亂涼州中郎將董卓拒討無功中平三年遣司空張溫行車騎將軍西討章遂溫表請堅與參軍事屯長安溫以詔書召卓卓良久乃詣溫溫責讓卓卓對應不順堅時在坐前耳語謂溫曰卓不佈罪而鴟張大語宜以召不時至陳軍法斬之溫不忍發舉乃曰君且還堅因起出章遂聞大兵向至黨衆離散皆乞降軍還議者以軍未臨敵不斷功實然聞堅數卓三罪勸溫斬之無不歎息拜堅議郎時長沙賊區星自稱將軍衆萬餘人攻圍城邑乃以堅爲長沙太守旬月之間克破星

等周朝郭石亦帥徒衆起于零桂與星相應遂越境尋討
三郡肅然漢朝錄前後功封堅烏程侯靈帝崩卓擅朝政
諸州郡並興義兵欲以討卓堅亦舉兵比至南陽衆數萬
人南陽太守張咨聞軍至晏然自若堅以牛酒禮咨咨明
日亦咨詣堅酒酣便牽咨于軍門斬之郡中震慄前到魯
陽與袁術相見術表堅領豫州刺史遂治兵于魯陽城進
軍討卓卓遣步騎數萬人逆堅輕騎數十先到堅方行酒
談笑勅部曲整頓行陣無得妄動卓兵見堅士衆甚整不
敢攻城乃引還尋徙都西入關焚燒雒邑堅乃至雒修諸
陵訖引軍還住魯陽術使堅擊劉表表遣黃祖逆于樊鄧

之間堅擊破之追渡漢水遂圍襄陽單馬行峴山爲祖軍
士所射殺時年三十七堅子權旣稱尊號諡曰武烈皇帝
三國吳
志本傳

孫策字伯符堅子堅初興義兵策居舒與周瑜相友善收
合士大夫江淮間人咸向之堅薨渡江居江都吳景時爲
丹陽太守策就景因緣召募得數百人興平元年從袁術
術甚竒之以堅部曲還策術常歎曰使術有子如孫郎死
復何恨遣策攻廬江太守陸康拔之策說術平定江東術
表策爲折衝校尉行殄寇將軍兵纔千餘騎數十匹賓客
願從者數百人比至歷陽衆五六十策渡江轉鬪所向皆

破莫敢當其鋒吳人嚴白虎等衆各萬餘人處處屯聚策
曰虎等羣盜非有大志此成禽耳遂引兵渡江據會稽屠
東冶乃攻破虎等盡更置長吏策自領會稽太守時袁術
僭號策以書責而絕之曹公表策爲討逆將軍封吳侯建
安五年曹公與袁紹相拒于官渡策陰欲襲許迎漢帝密
治兵部署諸將未發爲故吳郡太守許貢客所殺策創甚
呼權佩以印綬謂曰舉江東之衆決機于兩陳之間與天
下爭衡卿不如我舉賢任能各盡其心以保江東我不如
卿卒年二十六權追諡曰長沙桓王

三國吳
志本傳

三國吳

孫靜字幼臺堅季弟也堅始舉事靜糾合鄉曲宗族以爲保障策破劉繇進攻會稽靜與策會于錢唐時太守王朗拒策于固陵策不能克靜說策曰朗負阻城守難可卒拔查瀆南去此數十里道之要徑宜從彼據其內所謂攻其無備出其不意者也策曰善至昏暮四維然火誑朗便分軍夜投查瀆道襲高遷屯朗大驚帥兵前戰策破之遂定會稽表拜靜爲奮武校尉權統事遷昭義中郎將終于家子瑜字仲異建安九年領丹陽太守十一年與周瑜共討麻保二屯破之後從權拒曹公于濡須遷奮威將軍建安

二十年卒

通志宗室傳

孫皎字叔朗瑜弟始拜護軍校尉時曹公數出濡須皎每赴拒號爲精銳遷都護督夏口輕財能施善于交結嘗下令曰今所誅者曹氏其百姓何罪自今以往不得擊其老弱由是江淮間多歸附者後呂蒙襲南郡命皎爲後繼定荊州建安二十四年卒皎弟奐字季明代統其衆以揚武中郎將領江夏太守黃武五年權攻石陽奐使所部將軍鮮于丹帥五千人先斷淮道自帥五千人爲軍前鋒降高城得三將大軍引還權過其軍見軍陣整齊嘆曰初吾憂其遲鈍今治軍諸將少能及者吾無憂矣拜揚威將軍封

沙羨侯

通志宗室傳

孫賁字伯陽父羗字聖壹堅同產兄也堅于長沙舉義兵
賁從征伐堅薨賁攝帥餘衆扶送靈柩後袁術徙壽春賁
又依之術從兄紹用會稽周昂爲九江太守紹與術不協
術遣賁攻破昂于陰陵術表賁領豫州刺史轉丹陽都尉
行征虜將軍討平山越時策已平吳會二郡賁與策征廬
江太守劉勲江夏太守黃祖軍旋聞繇病死過定豫章上
賁領太守後封都亭侯建安十三年使者劉隱奉詔拜賁
爲征虜將軍領郡如故在官十一年卒子鄰嗣年九歲代
領豫章討平叛賊政績修理召還武昌爲繞帳督遷夏口
沔中督威遠將軍所居任職赤烏十二年卒賁弟輔字國

儀以揚武校尉佐策平三郡策討丹陽七縣使輔西屯歷陽以拒袁術又從策討陵陽生得祖郎等策西襲廬江太守劉勲輔隨從身先士卒有功策立輔爲廬陵太守撫定屬城分置長吏遷平南將軍假節領交州刺史

三國吳志本傳

吳景孫破虜吳夫人弟本吳人徙錢塘常隨堅征伐有功拜騎都尉袁術上景領丹陽太守討故太守周昕遂據其郡孫策與孫河呂範依景合衆共討涇縣山賊祖郎郎敗走會景爲劉繇所迫復北依術術以爲督軍中郎將與孫資共討樊能于麋於橫江又擊笮融薛禮于秣陵時策被剗牛渚降賊復反景攻討盡禽之從討劉繇繇奔豫章策

復以景爲丹陽太守漢遣議郎王誦銜命南行表景爲揚武將軍領郡如故八年景卒官子奮授兵爲將封新亭侯

三國吳志
吳夫人傳

孫桓字叔武河之子也年二十五拜安東中郎將與陸遜共拒劉備備軍衆甚彌山盈谷桓投刀奮命與遜戮力備遂敗走桓斬上兜道截其徑要備踰山越險僅乃得免忿恚歎曰吾昔初至京城桓尚小兒而今迫孤乃至此也桓以功拜建武將軍封丹徒侯下督牛渚作橫江塢會卒

吳志
本傳

按吳志本傳注桓博學強記權嘗稱爲宗室顏淵然其

戮力行間却敵致勝功略尤長省志列文苑舊志列武功權其輕重當以舊志爲允今從之後如宋代錢惟治俞灝等並以武功兼長文苑今從重載錄不取兩岐前志重複牽附之處槩爲澄汰

孫韶字公禮伯父河本姓俞氏賜姓爲孫韶年十七收河餘衆繕治京城起樓櫓修器備以禦敵權試攻驚之兵皆乘城傳檄備警謹聲動地頗射外人權使曉諭乃止明日見韶甚器之卽拜承烈校尉統河部曲一如河舊後爲鎮北將軍韶爲邊將數十年善養士卒得其死力常以警疆場遠斥堠爲務先知動靜而爲之備故鮮敗青徐汝沛頗

來歸附淮南濱江屯候皆撤兵遠徙徐泗江淮之地不居者各數百里自權西征還都武昌韶不進見者十餘年權還建業乃得朝覲權問青徐諸屯要害遠近人馬衆寡魏將帥姓名盡具識之身長八尺儀貌都雅權歡悅曰吾久不見公禮不圖進益乃爾加領幽州牧假節赤烏四年卒

三國吳志本傳

凌統字公績吳郡餘杭人也父操輕俠有膽氣孫策初興每從征伐常冠軍屢鋒遷破賊校尉及權統軍從討江夏中流矢死統年十五權以操死國事拜統別部司馬使攝父兵後從擊山賊統率厲士卒身當矢石所攻一面應時

披壞諸將乘勝遂大破之權壯其果毅復征江夏統爲前鋒與所厚健兒數十人共乘一舫常去大兵數十里行入右江斬黃祖將張碩時呂蒙欺其水軍而統先搏其城于是大獲權以統爲承烈都尉與周瑜等拒破曹公于烏林遂攻曹仁遷爲校尉又從破皖拜盪寇中郎將領沛相與呂蒙等西取三郡反自益陽從往合肥爲右部督時權徹軍前部已發魏將張遼等奄至津北權使追還前兵兵去已遠勢不相及統率親近陷圍扶杆權出敵已毀橋橋之屬者兩版權策馬驅馳統復還戰左右盡死身被創所殺數十人度權已免乃還偷敗路絕統被甲潛行權旣御船

見之驚喜統痛親近無反者悲不自勝權引袂拭之謂曰
公績亡者已矣苟使卿在何患無人拜偏將軍權勅屬城
凡統所求皆先給統素愛士士亦慕焉得精兵萬餘人過
本縣步人寺門見長吏懷三版恭敬盡禮親舊故人恩意
益隆事畢當出會病卒時年四十九權聞之減膳流涕二
子烈封內養于宮愛待與諸子同追錄統功封烈亭侯三

吳志
本傳

全琮字子璜錢塘人父柔會稽東部都尉孫策到吳柔舉
兵先附策表柔為丹陽都尉琮顯名遠近權以為奮威校
尉授兵數千人使討山越因開募召得精兵萬餘人出屯

牛渚稍遷偏將軍黃武元年魏以舟軍大出洞口權使呂
範督諸將拒之軍營相望敵數以輕船鈔擊琮常帶甲仗
兵伺敵數千人出江中擊破之梟其將軍尹廕進封錢唐
侯四年假節領九江太守七年權到皖使琮與陸遜擊曹
休破之于石亭是時丹陽吳會山民復爲寇賊攻沒屬縣
權分三郡險地爲東安郡琮領太守明賞罰招誘降附數
年中得萬餘人權召琮還牛渚罷東安郡嘉禾二年督步
騎五萬征六安六安民皆散走諸將欲分兵捕之琮曰夫
乘危徼倖舉不百全者非國家大體也今分兵捕民得失
相半縱有所獲猶不足以弱敵而副國望如或遲追虧損

非小與其獲罪寧以身受之不敢微功以負國也赤烏九

年遷右大司馬左軍師十二年卒

三國吳志本傳

初琮爲將甚勇

決當敵臨難奮不顧身及作督帥養成持重每御軍多任

計策不營小利權密使子登出征已出軍次于安樂羣臣

莫敢諫琮密表曰古來太子未嘗偏征也故從曰撫軍守

曰監國今太子東出非古制也臣竊憂疑權從之命登旋

軍議者咸以爲琮有大臣之節

江表傳

全緒琮長子幼知名奉朝請出授兵稍遷揚武將軍牛渚

督孫亮卽位遷鎮北將軍東關之役緒與丁奉建議引兵

先出以破魏軍封一子亭侯年四十四卒

吳書

南北朝

吳喜本名喜公宋明帝減爲喜臨安人少知書涉獵史漢頗見古今爲主圖令史沈慶之征蠻請喜自隨建義事平以喜爲主書擢河東太守殿中御史大明中黜歛二縣有亡命數千人攻破縣邑世祖遣喜將數十人至二縣誘說羣賊賊卽日歸降太宗卽位東兵急喜請得精兵三百致死于東上大悅卽假建武將軍簡羽林勇士配之議者以喜刀筆主者不當爲將不可遣巢尚之曰喜昔隨沈慶之屢經軍旅性旣勇決又習戰陣若能任之必有成績喜乃東討百姓聞吳河東來卽望風起應大破逆賊于錢塘之

定山故喜所至克捷封竟陵縣侯東土平定又率所領南
討遷輔國將軍尋陽太守南賊退走喜追討平定荊州泰
始五年魏寇豫州喜統諸軍出討大破魏于荆亭六年又
率軍向豫州拒魏加假節督豫州諸軍事明年還京死子

徽民襲爵

宋書
本傳

杜稜字雄盛錢塘人世爲縣大姓頗涉書傳少落泊不爲
當世所知遂遊嶺南事梁廣州刺史新淪侯蕭映映卒從
高祖恒典書記侯景之亂命稜將領平蔡路養李遷仕皆
有功軍至豫章梁元帝承制授石州刺史上陌縣侯邑八
百戶侯景平高祖鎮朱方稜監義興瑯琊二郡高祖誅王

僧辯召與同行及僧辯平後高祖東征杜龕等留稜與安都居守徐嗣徽任約引齊寇濟江攻臺城安都與稜隨方抗拒稜晝夜巡警綏撫士卒未常解帶賊平以功除通直散騎常侍右衛將軍丹陽尹永定三年高祖崩世祖在南皖時內無嫡嗣外有強敵侯瑒侯安都徐度等並在軍中朝廷宿將唯稜在都獨典禁兵乃與蔡景歷等奉迎世祖遷領軍將軍太建二年徵爲侍中尋加特進護軍將軍以公事免侍中護軍四年復爲侍中右光祿大夫卒于官時年七十諡曰成其年配享高祖廟廷子安世嗣

陳書本傳

按杜稜有二一見于陳武帝時一見唐乾符廣明間異

代同名皆以武略光于簡策舊府志所載祇有唐杜稜而以陳書之杜稜入文苑蓋因本傳有頗涉書傳一語然稜歷事三帝屢備折衝雖其文學有足多者據事定名列入武功爲允

駱牙字旗門臨安人年十二宗人有善相者云此郎容貌非常必將遠致梁太清末世祖嘗避地臨安牙母陵覩世祖儀表知非常人賓待甚厚及世祖爲吳興太守引牙爲將帥因從平杜龕張彪等每戰輒先鋒陷陣勇冠衆軍以功授直閣將軍永定三年除安東府中兵參軍出鎮冶城尋從世祖拒王琳于南皖世祖卽位授假節威虜將軍員

外散騎常侍封常安縣侯邑五百戶尋爲臨安令遷越州刺史三年以平周迪之功遷冠軍將軍臨川內史至德二年卒時年五十七

陳書本傳

按南史駱牙作駱文牙常安縣侯作臨安縣侯

陸知命字仲通富春人性好學通識大體釋褐陳始興王行叅軍及陳滅歸于家會高智慧等作亂于江左晉王廣鎮江都以其三吳之望召令諷諭反者知命說下賊十七城得其渠帥陳正緒等三百餘人以功拜儀同三司知命兄天下一統勸高祖都洛陽因上太平頌以諷焉詣朝堂上表請使高麗授普寧鎮將煬帝嗣位拜治書侍御史倨

然正色爲百寮所憚遼東之役爲東甌道受降使者卒于

師

隋書
本傳

唐

杜稜字騰雲新城人唐乾符廣明間盜賊寇掠兩浙杭州
練諸縣鄉兵討之稜爲東安都將更號武安營八都董呂
爲長武肅王副之僖宗拜王爲杭州刺史稜傾心事之潤
州牙將劉浩逐其帥周寶奔常州浩推薛朗爲帥王命稜
與成及阮結討之敗其將丁重德趙君度取常州奉寶歸
杭除常州制置使大順二年王以淮南數侵邊境令稜築
東安城自固稜相險易度資用因山爲城環城以池越十

月而訖事王領鎮海節度使稜充副使王討董昌昌乞師淮南淮南將田頔安仁義率衆攻東安稜憑城自守會乏水穿井百尺不得泉稜默禱于神泉卽湧地出頔仁義號勇將樓櫓翔空矢石交迸稜隨機應敵斃淮安兵于城外者無算唐進稜行軍司馬累官潤州刺史

十四國春秋

五代

錢鏐字具美臨安人里中有大木鏐幼時與羣兒戲木上鏐坐大石指麾羣兒爲隊伍號令頗有法羣兒皆憚之壯善射與梨利通圖緯諸書唐乾符二年浙西裨將王郢作亂石鑑鎮將董昌募鄉兵討賊表鏐偏將擊郢破之時黃

巢攻掠浙東至臨安鏐出奇兵邀之與勁卒二十人伏山谷中巢先鋒度險皆單騎鏐伏弩射殺其將巢兵亂鏐引勁卒蹂之斬首數百級乃引兵趨八百里八百里地名也告道旁媼曰後有問者告曰臨安兵屯八百里巢衆至聞媼語皆曰十餘卒不可敵況八百里乎急引兵過都統高駢表昌爲杭州刺史昌以鏐爲都指揮使中和二年越州觀察使劉漢宏與昌有隙遣弟漢宥屯兵西陵鏐率八都兵渡江竊取軍號斫其營營中驚擾因焚之漢宥敗走漢宏復遣將黃珪何肅屯諸暨蕭山鏐皆擊破之四年漢宏遣將朱褒施堅實等以舟兵屯望海鏐出平水破褒等于

曹娥埭進屯豐山堅實降遂攻降越州漢宏走台州刺史
執漢宏送鏐斬于會稽鏐奏昌代漢宏而自居杭州光啓
三年拜鏐左衛大將軍杭州刺史是歲潤州帥周寶奔常
州鏐遣將成及杜稜等攻常州取寶以歸昭宗拜鏐杭州
防禦使是時楊行密據淮南鏐取蘇常唐升越州威勝軍
以昌爲節度使杭州武陵軍拜鏐都團練使景福二年拜
鎮海軍節度使乾寧二年董昌反鏐以狀聞昭宗下詔封
鏐彭城郡王浙江東道招討使昌遣將崔溫等屯香巖石
侯鏐遣顧全武攻昌斬溫昌兵敗全武執昌歸杭州行至
西小江昌投水死拜鏐鎮海鎮東軍節度使加檢校太尉

中書令賜鐵券鏐如越州受命還治錢塘號越州爲東府
光化元年移鎮海軍于杭州加鏐檢校太師改鏐鄉里曰
廣義鄉勲貴里鏐素所居營曰衣錦營婺州刺史王壇叛
楊行密遣將康儒應壇鏐敗儒于軒渚壇奔宣州詔鏐圖
形凌烟閣升衣錦營爲衣錦城石鑑山曰衣錦山大官山
曰功臣山天復二年封越王天祐元年封吳王鏐建功臣
堂立碑紀功四年升衣錦城爲衣錦軍梁太祖卽位封吳
越王開平二年加鏐守中書令改臨安縣爲安國縣廣義
鄉爲衣錦鄉四年楊渥將周本陳章圍蘇州鏐遣弟鋹鏐
救之大敗本等乾化元年加鏐守尚書令兼淮南宣潤等

道四面行營都統制貞明三年加鏐天下兵馬都元帥開府置官屬唐莊宗入洛賜鏐玉冊金印鏐以鎮海等軍節度授其子元瓘自稱吳越國王長興三年卒年八十一諡

曰武肅

五代史吳越世家

錢元瓘原名傳瓘字明寶少爲質于田頔頔叛于吳楊行密會越兵攻之頔戰死元瓘得歸鏐臥病諸將皆曰元瓘從王征伐最有功請立之鏐召元瓘曰諸將許爾矣襲封吳越國王天福六年卒諡文穆

五代史吳越世家

處州刺史盧約

弟佖寇永嘉傳瓘承王命伐永嘉佖列巨舟四十艘于清

澳海門以邀我師傳瓘謂諸將曰賊銳卒盡在此矣姑弗

與戰當由他道竟襲賊壘出其不意必成擒也于是自安

固江登陸而襲之遂斬佖

十國春秋

吳行營招討使李濤帥衆

二萬出千秋嶺攻吳越衣錦軍鏐以傅瓘爲北面應援都

指揮使救之千秋嶺險狹傅瓘使人伐木以斷吳軍之後

而擊之吳軍大敗擒濤以歸吳遣宣州副指揮使花虔將

兵會廣德鎮使渦信屯廣德將復寇衣錦軍傅瓘就攻之

拔廣德獲虔信以歸

資治通鑑

錢鏐大舉伐吳以傅瓘爲諸軍

都指揮使帥戰艦五百艘自東洲以進吳遣將拒之傅瓘

命每船皆載灰豆及沙戰于浪山江吳船乘風而進傅瓘

引舟避之既過自後隨之吳回船與戰傅瓘使順風揚灰

吳人不能開目及船舫相接傳囑使散沙于已船而散豆于吳船豆爲戰血所漬吳人踐之皆僵仆傳囑因縱火焚

吳船吳兵大敗

文獻通考

錢宏佐字元祐文穆王第六子天福六年卽王位開運三年南唐李景攻閩閩李宏達更名達遣將徐仁宴等奉表稱臣乞師王召諸將計事諸將皆不欲行惟內牙都監使水邱昭券以爲當救王曰吾爲天下元帥曾不能恤鄰難將安用之命昭券專掌用兵內都監使程昭悅掌應援餽運而以軍謀委丞相元德昭遣統軍使張筠趙承泰將兵三萬水陸救福州十一月兵至福州自晉浦南潛入州城

唐兵進據東武門禦之不利十二年三月王遣將佘安自海道救福州兵至白蝦浦海岸泥淖方布竹簣以行唐兵聚射之簣不得施縱兵登岸大呼奮擊大破唐兵獲其將楊匡業蔡遇等器械數十萬遂引兵入福州李達舉所部歸附五月凱旋王饗將帥于光冊堂賞資有差六月王薨

諡忠獻

十國春秋

錢俶字文德吳越王佐卒弟俶繼俶廢俶時鎮浙東遂渡江襲位漢授以東南面兵馬都元帥仍領鎮海鎮東節度使至周以天下兵馬都元帥處之宋興改大元帥開寶六年俶募吏入貢太祖謂之曰汝歸語元帥當訓甲練兵江

南僭彊不朝我將討之元帥當助我無惑人言云皮之不存毛將安附命有司造禮賢宅以待兩浙江南之先來朝者王師討江南以僭爲昇州東面招討制置使李煜貽書于俶曰今日無我明日豈有君一旦易地酬勲王亦大梁一布衣耳俶以其書來上加守太師又遣大將沈承禮率兵隨王師平潤州詔俶歸國江南平俶來朝太祖待俶甚厚自晉王宰相及中外臣僚上章請留俶太祖曰俶委質來朝若利其土宇而留之何以示信于天下及俶歸國太祖以黃絹封文字一複付俶曰俶到國卽開之俶至國啓封皆留俶章也俶上表謝太平興國三年復來朝遂以國

歸有司太宗改封假淮海國王以禮賢宅賜之假以天下
既平求去元帥之稱從之改漢南國王雍熙四年出爲武
勝軍節度使徙國南陽既又辭國號改封許王端拱元年

薨諡曰忠懿

東都
事畧

成及字宏濟錢塘人咸通中捍山賊逐齊寇隸八都以富
春鎮爲靜江都將屬劉漢宏作亂與武肅王同事攻討漢
宏鎮將孟安謀亂卽席奮劍將犯王及舉胡床制之因執
孟安就戮復爲靜江鎮將光啓中命征潤州薛朗常州刺
史丁從實具牛酒犒師遣美女于諸將及取而斬之餘悉
不納因克之尋平潤州授充常州防禦使尋爲蘇州刺史

乾寧時淮人圍姑蘇常熟鎮將陸郢巡檢郭用與其黨趙
邯以城應城陷及至淮南楊行密辟爲行軍司馬及日以
百口托于錢塘不幸城陷至此豈宜復以本道符竹援富
貴于隣境乃引佩刀自刺行密遽止之厚禮而歸焉署鎮
海軍節度副使天復中王巡衣錦軍命武舅都將士治溝
洫軍中作亂及護王駕廻至北郭王微服將入城及乃代
乘王車行與賊鬪王遂得入累授保大彰義等軍節度使

吳越
備史

阮結字韜文錢塘人唐末杭州建八都結亦與爲副焉結
出入武肅王左右號親校中和二年以征劉漢宏功奏授

散騎常侍光啓三年征常州又平潤州四年充潤州制置

使卒

十國
春秋

吳公約字處仁餘杭人黃巢之亂杭州八都旣建已而析
號十三都公約其一也初負膽畧爲縣豪會朱直起兵應
募西討以功置西桂鎮過使未幾從董昌禦黃巢于西鄙
加御史中丞奏置都額改峽石爲訓兵之所推鋒破銳日
有聲稱武肅王破越州公約驍果先登兵罷拜千牛衛將
軍劉浩平錄功擢散騎常侍徐約陷蘇州王委公約專征
授北面諸軍行營招討使克蘇州授義和鎮過使兼本軍
水陸都遊奕使淮人侵擾公約扞禦疆域屢挫敵鋒遷工

部尚書俄改刑戶二部乾寧四年卒

十國春秋

馬綽餘杭人初與錢鏐俱事董昌昌使鏐閱部伍亡其名籍鏐因歷唱之存亡健悴皆無遺失綽密謂鏐曰老子忌猜駭公強記當必相圖乃以白紙數番授鏐若代軍籍者鏐深德之因以其妹歸綽綽隨昌于越州尋棄家奔鏐授諸城都指揮使徐綰之亂綽有發懸門功鏐命子元瑾納綽女綽累職鎮東軍節度副使兩浙行軍司馬睦州刺史

雄武軍節度使卒

吳越備史

錢元璿字德輝武肅王之第四子起家授沂王府諮議叅軍累遷散騎常侍馬軍廳事指揮使天復二年徐綰叛顧

全武請奉王子之邦溝武肅以淮帥常請結姻好乃遣元
璚微服爲全武僕而去比及望亭有送旅媼輒識之至潤
州安仁義亦知其非常將以其下十人易之全武懼因賂
關中宵而去及抵邗溝指陳逆順之理淮帥爲之動容卽
日遣使命田頔還軍廣陵尋逆婦而歸後累征縉雲新安
皆有功授邵州刺史尋征吳興高澄及攻東洲復授睦州
刺史遷蘇州累授中吳建武等軍節度使太傅同中書門
下平章事侍中中書令文穆王卽位以王兄尤加禮遇封

廣陵郡王卒諡宣義

吳越
備史

鮑君福字慶臣錢塘人爲錢氏相賜田于錢塘今所謂鮑

家田是也性淳厚有膽氣從軍以驍果稱初從劉漢宏繼歸錢鏐累從征伐有功能馬上輪雙劍入陣望之若飛電屬陳章叛乃以淮帥命辟爲郡職君福力拒伺守者醉奔尋刺衢州淮將周本守信州屢侵其境君福斬呂師造擒馮敏周本僅以身免晉天福中卒謚忠壯子修遜寡言語總軍整肅開運中爲戍將護李璠斌于福州璠斌叛修遜殺之傳首錢塘

萬歷錢塘縣志

按十國春秋稱君福爲餘姚人子修遜又作修讓成化志不錄萬歷府志及萬歷錢塘縣志俱作錢塘人蓋杭州有鮑家田見十國春秋君福以餘姚人而移居錢塘

也今仍錄之

杜建徽稜子少強勇嘗于山莊構小茆齋私署軍州押衙
紀于棟稜加督責對曰大丈夫何止爲一軍事押衙耶稜
歸武肅王建徽以父命盡心于王稜在常州爲淮南所逼
建徽馳赴父難未及境而城已拔乃率部還新登及稜自
淮南歸軍中嚴整無改稜稱之累從征伐皆單衣入陣賊
衆無不披靡軍中謂之虎子徐綰之叛馳入援賊將聚木
焚北門建徽持火鈎取其木先焚之賊計遂罷睦州陳詢
叛鏐以建徽爲詢姻婭使馬綽伺其意建徽曰陳氏負恩
背義微旣姻婭義當見疑然累書敦諭皇天后土苟或鑒

照則拔城獲書方明徽心耳俄有睦州廳吏來降特建徽
所遺書至王嘉歎久之每朝會王必指之曰此杜丞相今
日忝有一方多其力也忠獻王時建徽春秋高尚能騎射
嘗從擊毬于廣場興酣有宿中箭鏃自臂中飛出人皆壯
之歷官自武安都將至涇源昭化等軍節度使吳越國丞

相封鄖國公年八十八卒

吳越
備史

吳敬忠於潛人從武肅王以八都兵討劉漢宏有功及王
出師討田頔敬忠先登陷陣奏捷而歸王封吳越兩國敬
忠授浙西營田副使兄順以功擢鎮海軍保城都指揮使

弟訢子八人仕本國皆貴顯

十國
春秋

曹圭仁和人圭少有膽氣唐末仕吳越爲嘉興都將淮人
圍嘉禾圭與其族人師魯守之淮人望氣者曰此雖孤城
中有貴人不可圖也嘉禾平以功授蘇州刺史開平中淮
人復圍姑蘇屬正月望夜師魯第盛陳燒燈之宴賊俘執
者咸縱觀之圭以浙西營田副使終于蘇州師魯形短小
而多智鋤嘗稱曰今之晏嬰人因號爲曹晏嬰嘉靖仁
和縣志
曹仲達圭子少時圭嘗節其衣食雖嚴冬尚未挾纈品饌
悉與僕隸等又日令運甓武肅王見而奇之以妹儷焉累
授台處二州刺史文穆卽位命仲達權知政事國建拜丞
相忠獻王卽位復攝政事時大賚中外軍中有言不均者

輒舉仗不受賜諸將不能制仲達諭之因皆釋仗而致謝

卒諡安成

吳越
備史

宋

錢惟濬字禹川俛子纔數歲俛表授節度副使檢校太保
宋初領建武軍節度加至太尉後授鎮東等軍節度大軍
征金陵惟濬從俛下毘陵以功加平章事太宗卽位加兼
侍中俛獻地徙淮南節度加檢校太師從平太原征幽薊
又從幸大名雍熙中歷鎮安州端拱初封肅國公加兼中
書令淳化初卒追封邠王諡安僖

宋史
新編

錢惟治字和世琮子俛養爲己子累遷檢校太保台州團

練使乾德中制授寧遠軍節度檢校太傅與惟濬節旄同日而至國人榮之王師討江南惟治從俶率兵下常州策勲改奉國軍節度使太宗嗣位進檢校太尉俶旣納土惟治歸朝改領鎮國軍節度雍熙三年大出師征幽州命惟治知鎮定軍府事兼兵馬都部署訓兵饗士勤政務累上表請罷節鎮優詔不許景德中轉右武衛上將軍累加左騎衛上將軍左神武統軍卒贈太師

宋史新編

孫承祐錢塘人俶納其姊爲妃因擢處要職累遷鎮海鎮東兩軍節度副使知靜海軍節度事開寶初隨俶子惟濬入貢詔授鎮海鎮東等軍行營司馬王師渡江詔俶以所

部會攻常潤承祐從俶克毘陵功居多太平興國中俶獻其地徙承祐泰寧軍節度使五年從幸大名留知府事雍

熙二年改知滑州卒贈太子太師

宋史吳越世家

崔仁冀字子遷錢塘人事吳越爲通儒院學士太祖召吳越進奏使任知果令諭旨于其王俶曰元帥克毘陵有大功俟平江南可暫來與朕相見仁冀告俶曰主上英武所向無敵今天下事勢已可知保族全民策之上也太平興國三年俶入朝與仁冀決策表獻所管十三州一軍以仁

冀爲淮南節度使

續資治通鑑

錢禹卿字仲謨俶曾孫以父任爲太廟齋郎調雲安尉徙

令繁昌改大理丞擢通判霸州遷通直郎在霸州有告權
場火者衆相傳避兵至守陴警備禹卿曰何至是遣捕之
果小偷也在環州屬靈武用兵守陴禹卿提舉糧草夏縱
抄而禹卿崎嶇獨全霸環西北要害郡朝廷方欲用之而

禹卿于元豐五年卒

是補之錢禹卿墓誌

沈晦字元用錢塘人選孫宣和進士除校書郎遷著作佐
郎金人攻汴京從肅王出質幹里雅布軍還爲給事中高
宗卽位除集賢殿修撰歷知建康府紹興四年爲廣西經
略兼知靜江府先是南州蠻酋莫公晟歸朝授本路鈐轄
羈縻之歲久遁去旁結諸洞蠻爲追患晦招誘諸酋喻以

威信皆詣府請降晦犒遺之結誓而去自是公屢孤立不復犯邊晦在郡歲買馬三千匹進徽猷閣學士召赴行在

除知衢州改潭州奉祠卒

宋史新編

按沈氏多才晦之祖邁以循吏稱遂以文學著括以名臣顯皆有光于史冊晦博覽強記長于著作史稱其學問過人至其雄才大略出使則多著勞績守邊郡則招降蠻酋卒靜邊患洵乎功在社稷非徒沾沾于經生之學者從省志錄入武功

俞灝字商卿世居杭登紹熙四年第仕淮東宣撫佐畢再遇救山陽灝料金必窺采石請回軍石梁河以遏其鋒金

擣虛不入而遁再遇知揚州監平湖海多瀨計盡再遇欲
誅脅從者瀨救活甚衆開禧議開邊瀨言輕脫寡謀之人
不可信趙良嗣張覺往轍可鑑歷乘旋節皆有聲賢慶二
年致仕

咸淳志

元

許懋字國器元季值歲饑發家儲振貸復以萬戶長督海
運抵大都投杭州路治中不就紅巾賊起懋倡子弟義勇

力戰却之

嘉靖海寧縣志

明

孫鼎字景鉉餘杭人洪武十五年貢入中都國子監二十

九年除都察院照磨永樂中歷官陝西按察司副使督兵
邊郡累立戰功尋卒于官建祠其地其長子以父功襲四
川土司世世不絕次子還家餘杭後達者皆其裔云
岑斌錢塘人征雲南有功陞姚安千戶洪武十七年開設
千戶所公署其所營繕尤得士卒心及卒無不痛悼爲之

立祠

雲南通志

周文字顯謨富陽人永樂癸卯舉人授福建武平教諭造
就人才名流多出其門考滿擢河南道監察御史正統間
中官王振方用事文抗疏論之學士倪謙以憂制留用文
固請容謙終制識者重其敢言十四年鎮遠播州苗俱作

亂頗猖熾朝議命文督兵至則單車詣賊宣諭國威賊果
歸欵卽命巡按貴州景泰二年巡撫廣東會殘寇復叛又
親督軍平之請以其地建順德縣設官分治民賴以安未
幾以艱歸卒于家

富陽縣志

按循吏卷中有周文亦明時人貫仁和與此異

楊寧字彥謚宣德五年進士授刑部主事正統四年與都
督吳亮征麓川賊欵軍門約降寧曰兵未加而先降誘我
也宜嚴兵待之不聽令寧督運金齒賊果大至官兵敗績
諸將獲罪寧擢郎中

明史本傳

辛酉大舉伐麓川總督王驥仍

以寧行寧督戰渡江攻上江賊砦賊矢石如雨寧奮不顧

身督戰益力士卒咸用命遂克之又進攻杉木籠山賊柵
險拒守寧曰賊狃于前勝當多方以誤之使不暇併力乃
可圖驥從其言令諸將各視形便以進諸道俱奮連破七
砦乘勢擣賊巢園之因乘風舉火烟焰漲天賊不知所爲
死鋒鏑及墮崖溺水者不計其數師還陞刑部右侍郎奉
命參贊雲南軍務至則練兵伍督耕屯懷撫遠人民夷悅
服時麓川賊首逸于緬寧簡銳師若將有所向者先遣使
奉詞責緬緬人懼求出賊自效卒誅大憝函其首以獻還
朝未幾閩浙東廣寇竊發江右密邇三境命寧巡撫寧至
按視郡縣當賊衝者增城垣立排柵以斷要路圍集鄉兵

訓以武藝賊有侵軼者輒擊斬之以故賊聞風畏避不敢犯景泰初還京拜禮部尚書調南京刑部天順改元致仕兩浙名賢錄

按寧明史作歙人蓋寧之原籍也省志選舉錢唐人鄭顥字士昂錢塘人宣德舉人授江西樂安縣教諭邑無賴會子良輩嘯聚大槩山顥率民兵出戰賊潰邑賴以寧擢監察御史陞雲南按察司副使時麓川思機發不靖靖遠伯王驥薦顥參贊總兵征南將軍沐昂軍務苗賊攻圍貴州地方告急顥曰唇亡則齒寒卽與總兵調兵策應賊聞之宵遁烏撒畢節赤水永寧站路營堡被賊燒燬遣指

揮使楊濬率軍整葺之騰衝與麓川接壤添設衛所願區
畫布置立營以居分出以耕立市井有無相易保障益固
陞大理寺少卿督運糧餉陞右僉都御史參贊如舊思機
發竄伏緬甸朝廷欲發兵征捕願奏遣都指揮等官往諭
之緬甸卽出思機發之母子妻女械送京師陞左僉都御

史調福建按察司副使

浙江通志

沈慶字仲會餘杭人學博才膽尤精兵法宣德舉人官翰林院五經博士大學士陳循薦宜大用陞湖廣按察司僉事時靖州五開等處苗賊生發把截道路慶相地設官鑿山濬河自偏道鎮直抵黃平迂道千餘里據壕立兵以地

利制賊賊李珍蒙能大肆猖獗慶親率兵突陣殲厥渠魁擒其黨二百餘人陞本司副使巡邊整飭兵備成化初復領漢土官兵十萬餘衆進攻臘屋桃林武岡南洞等處一鼓擒獲賊境悉平進階亞中大夫請老歸

嘉靖餘杭縣志

鄭暹錢塘人正統初由鄉舉任贛州通判十三年閩廣盜起暹躬率丁壯萬餘人設法防禦境賴保全超陞知府

天啟

贛州府志

王業字時泰世襲仁和衛副千戶祖父世其職業年十六襲職京師適車駕北征例當扈從業在軍中動循紀律而勇畧過人旣凱還任吉安專督屯事而一軍政務咸咨焉

梅花峒寇作業往平之永豐大盤山賊首曾子良聚衆劫殺郡守陳本深謀于業業奮然曰兵固不敢擅調然民患之急如此可坐視乎占有先發後聞者卽日選精兵二百餘人倍道以行或諷其急業曰彼賊烏合之衆耳若少緩則有備猝至逼其營壘一鼓而勝之捷聞陞本所正千戶閩浙寇起遣大將寧陽侯往討之吉安軍當調業統以往從都督劉某殺丁公崖賊大軍潰而業軍獨全因歎曰吾不得用其智而徒制于人上不能爲朝廷殺賊下不能爲生民除害何以爲人臣遂以鬱憤卒業爲人輕財好義撫馭士卒嚴而有恩臨陣勇氣勃發目光如電橫戈而往前

無堅敵有古名將風

兩浙名賢錄

盛德字大本於潛人以明經入太學授南城兵馬司副遷
鎮江府通判時海寇王良僭號崇明勢猖獗臺司有修隙
于德者命領前隊往剿德毅然曰臨難而避非忠也遂鼓
衆乘風夜抵賊舟良驚以爲神赴水遁去衆亂遂殲之隨
撫其降卒二人爲向導直搗其巢生擒良以歸時大帥湯
震駐師四十里外聞報揚帆遽至盡攘其功德僅獲賞宴
加級尋以疾致仕歸

於潛縣志

崔端字惟正海寧衛指揮僉事偉軀幹多膂力精騎射景
泰間倭入貢還所過求索至攘斂手刃人浙藩檄端防護

端耀兵戢旅臨之以威倭酋帖服無何處婺山民相扇弗靖都督徐恭統兵剿之聞端才檄爲前鋒端率勁兵擣其巢生擒賊首陶得禮上功幕府進指揮同知備倭把總分守浙東端感激自奮水陸之行無一日休而勞頓困憊疽發于背疾革大呼曰大丈夫不以馬革裹屍竟死于床第

間乎言畢而逝

兩浙名賢錄

蔣琳錢塘人隰子清強鷙銳勇于立功巡撫貴州提督總兵軍馬先是草塘寇叛官軍屢挫琳至計須獮薙而總兵以下難之琳乃躬爲之奮率先以征一鼓直抵巢穴掃汎而還璽書褒嘉有忠誠謀勇盡心爲國之語自是諸苗歛

畏後坐于謙黨論死

文化舊志

彭信字中孚仁和人景泰進士巡按廣東時嶺南未靖武將專征以信儒生頗易之及出師誓衆爲帥指陳方畧揆度事機切中肯綮卒之殄滅狡寇兵無挫衄信功爲多倖奏帥以所得賞讓信信曰吾文士也吾身有階奚以武爲人多其不伐改按陝西成化初擢順天府丞卒于官

仁和縣志

洪鐘字宣之錢塘人成化十一年進士爲刑部主事遷郎中奉命安輯江西福建流民還言福建武平上杭清流永定及江西安遠龍南廣東程鄉皆流移錯雜習鬪爭易亂宜及平時令有司立鄉社學教之詩書禮讓宏治初再遷

四川按察使馬湖土知府安鼇恣淫虐土人怨之刺骨僉
事曲銳請巡按御史張鸞按治鐘贊決捕鼇送京師置極
刑歷江西福建左右布政十一年擢右副都御史巡撫順
天整飭薊州邊備建議增築塞垣自山海關西北至密雲
古北口黃花鎮直抵居庸延亘千餘里繕復城堡二百七
十所悉城緣邊諸縣因奏減防秋兵六千人歲省輓輸犒
資費數萬正德元年由巡撫貴州召督漕運明年就進右
都御史改掌南京都察院遷刑部尚書四年冬加太子少
保兼左都御史掌院事五年春湖廣歲饑盜起命鐘以本
官總制軍務陝西河南四川亦隸焉沔陽賊楊清邱仁等

出沒洞庭間圍岳州陷臨湘官軍屢失利鐘及總兵官毛倫檄都指揮潘勲擊破之禽斬七百四十餘人賊遂平時保寧賊藍廷瑞鄆本恕其黨廖惠衆十萬餘置四十八總管延蔓陝西湖廣之境廷瑞與惠謀據保寧本恕謀據漢中取鄖陽由荆襄東下巡撫林俊方議過通江而惠已至攻陷其城殺參議黃瓚僉事錢朝鳳等遁去適官軍自他郡還賊疑援兵至亦遁俊益發羅猓及石砭土兵進勦羅猓奮擊之禽斬八百餘人俊復遣知府張敏何珊等追之獲惠餘衆奔陝西西鄉鐘乃下令招撫歸者萬餘人旣而賊收散亡陷營山縱掠蓬劍二州鐘赴四川與俊議多不

合軍機牽制賊益熾已乃檄陝西湖廣河南兵分道進湖
廣兵先追及于陝西石泉巡撫藍章方駐漢中廷瑞乞還
川就撫章以廷瑞本川賊恐急之必致死陝且受患遂令
護之出境廷瑞旣入川求降鐘等令至東鄉聽撫賊意在
緩師要求營山縣或臨江市屯其衆遣官爲質鐘令漢中
通判羅賢入其營本恕來謁約旣定會官軍有殺其樵採
者賊復疑懼遂殺賢剽如故官軍爲七壘守之賊不得逸
廷瑞以所掠女子詐爲已女結婚于永順土舍彭世麟與
得間逸去世麟密白鐘鐘授方略及期廷瑞暨其黨二十
八人咸來會伏發悉就擒其衆聞變驚潰鐘遣兵追擊俘

斬七百餘人以功進太子太保乞歸嘉靖三年卒諡襄惠

明史
本傳

按洪襄惠以明斷之才剖獄如流所至政聲流溢誠爲良吏後總畧四省適遇陸梁而設伏出奇動協機要卒賴掃除功業爛焉易名之制曰襄惠省志入之武功從其重也

沈銳字文進號省齋仁和人成化進士初授刑部主事獄無留滯尋轉員外郎陞江西南按察僉事擊服豪右貪墨吏悉解綬去尤孳孳以興學化民爲務轉廣東僉事龍水後山賊起銳設方畧與賊數十戰輒破賊進圍其巢賊衆糧

盡出奇兵從間道搗虛擒獲無算賊平當坐者數千人銳
悉全活之乙丑陞廣西按察使進廣東布政使尋陞應天
府尹剛鯁不撓正德初進南京刑部右侍郎值劉瑾用事
鏡上疏極言時政不報遂乞歸瑾惡其忤已乃摘往事中
傷之矯旨奪職逮問瑾誅乃復官旋進階通議大夫卒年

七十六

舊浙江通志

祝鰲號東田海寧人宏治甲子舉于鄉爲人恢奇負經濟
才嘉靖初知江西崇仁縣廉潔無與比御下威惠相濟得
人之死力時宸濠有異志鰲逆知之治兵器完府庫若爲
他盜備者宸濠反鰲乃徇于衆曰宸濠蓄逆謀久矣然性

躁才踈其下多羣盜不足畏也立襄戎事卒摧逆謀事既

定以功當遷擢遽拂衣歸

舊浙江通志

邵梗字良用仁和人嘉靖進士任福建巡海道駐漳州時
海禁廢弛奸民闌出入賈禍召寇梗下令曰凡奸民爲賊
間及違禁出物廉有狀者殺無赦羅織相告者勿詰于是
反側帖然益洛陞增陴選卒厲兵徃四郊積蓄入城中使
賊無所掠倭寇合兵犯長泰選火藥手百人躡擊之賊宵
遁又遣舟師攻海寇于月港銅山清浦諸處凡七克捕斬
無算餘寇自月港掠舟入海將遁義士沈講率所部兵
與官兵犄角邀賊舟于東燈以巨艦衝沉之擒斬二百餘

寇盜悉平

書

許嶽字子駿錢塘人登嘉靖庚戌進士第釋褐工部主事歷郎中出理九江蘆政一清擢河南按察司僉事備兵潁上時倭寇維揚揚非所轄地也當事以嶽才概以戰守事嶽立至危城簡丁壯授甲發陣命老弱傳殮躬率戰士出奇破賊賊竄遁去而危城完先是城門晝閉民避寇至者號呼不得入嶽親立馬城門下闔右而開左令民魚貫入入市畢而賊至得免鋒鏑者數萬計構誣謫汙陽州同知稍遷岳州府判岳城爲江水所嚙築輒圯十餘年不就及嶽薨役圯如曩時嶽呼天而泣曰三築不就請身葬江魚

以謝百姓夜若有人語之者曰亟穿井城中以滙激湍城
宜就嶽如其言不踰時而城成治爲三楚最轉荊州調德
安同知補廣西柳州猺獞入犯懷遠戕殺官吏全粵震動
時議募兵大勦嶽乃奏記當事諸將請以嶽所上方畧進
取屢戰屢捷賊大潰斬首二萬餘級功上天子嘉悅欽賜
帑金移梧州陞廣東按察使副使飭兵瓊崖瓊崖居海島
中黠寇藜藿與人民錯居間乃猺獞爲患而大盜李茂者
攻椎剽橫行閩廣間嶽乃撫而用之郡縣悉平尋乞骸骨
予告歸卒時七十有一所著有朱陸同源道德解蒙莊卮

言

錢塘縣志

陳洪濛字元卿臨安人嘉靖進士刑部主事歷遷江西按察副使九江兵備除戎器蒐卒補艘完城堞盜起必窮其窟而洗之歷陞右副都御史巡撫貴州兼督川東辰沅諸軍時施州蠻黃中叛跳川東支羅牛欄坪固剽掠旁郡邑詔洪濛偕楚蜀二鎮合兵討之洪濛自川東率大軍入深箐多張疑兵誘其毒矢石殆盡而間道募死士繞出其後急擊大破殺虜千五百餘級焚洞砦百餘蜀兵亦從西北躡之黃中迫挺身跳入楚叩軍門請死當是時貴與蜀有戰功而楚坐得酋首蜀與楚爭功不能決洪濛第謂楚蜀勢異不有勦者誰與撫地不有撫者誰與勦窟且皆天威

也三省安得微之疏上大司馬推洪濛能護而洪濛又與都督石邦憲合策破叛酋楊珂之六洞十二寨悉俘其父子兄弟餘黨歸農者以萬計屬疾疏請骸骨許之當候代傳鎮遠邛水巴狼苗普面等叛輿疾剗平御史上前後功

賜白金文綺加等

浙江通志

按洪濛爲洪範之弟舊省志稱仁和人仁和志及河南通志稱其出知彰德蒞政精勤修文廟樂器習音容以祀于郡學隙地構屋四十楹延諸生于內廩餼而課焉又治鄭王及伊王獄各當其罪非獨以武功見而武功尤著故錄于此

宋應昌號桐岡其先山陰人徙仁和嘉靖乙丑進士知絳州陞刑部員外郎轉刑禮二科左右給事出知濟南府歷江西福建左右布政使進都察院副都御史巡撫山東陞大理卿工部右侍郎隨改經畧以東征功加右都御史世襲錦衣衛正千戶應昌方面紫髯兩目閃閃如巖下電兩足下有大痣七唇含一痣如珠官給事新鄭方議互市卽疏陳不便者三江陵當國奏事者必先白副封應昌據牒以聞江陵怒遂出知濟南旣而建節山東首請防海復營衛巡司舊制未幾而有朝鮮之事朝鮮者故外藩好文而弱關白者日本倭也黠而悍萬歷壬辰舉六十六島之衆

突入朝鮮國王李昖走竄義州八道三韓殘破幾盡聲言
內犯京師戒嚴詔拜應昌兵部右侍郎經畧剋遼保定等
處防海禦倭軍務時經畧劄設提督大將軍李如松羈寧
夏兵食皆未備詔書督促部署出關會兵部尚書石星方
議西討遣遊擊沈惟敬往平壤宣諭要倭退兵倭佯許以
老我師應昌卽誓衆踏冰渡江春正月兵薄平壤其將平
行長築飛樓鑿牆穴守牡丹峰相犄角應昌圍其三門外
布蒺藜火器齊發毒焰蔽空吾軍攀附而上諸門盡破行
長遁回王京應昌知王京城南有龍山倉朝鮮兵食所積
以資倭倭必不退夜令死士以射火箭燒之十三座俱盡

倭棄王京去遣兵追擊至南原又追及晉州倭乃遁還熊
州西生浦戰勝之後拊惜傷殘招歸脅從仍分前兵屯守
太邛南原慶州等處善後之宜甚備行軍賞罰嚴明揆事
圖策出人意表初若不經思退而熟慮卽老吏宿將不能

易也

舊浙江
通志

徐鶴齡字蓉石海寧人嘉靖戊戌進士官陝西道御史巡
視兩淮漕政訪豪商置之法有贏羨悉報輸之邊時權貴
以無賂銜之外轉沂竟僉事值蝗旱設法賑之遂益簡卒
伍飭戎器爲先事之防汶上盜起賊首田斌及白蓮妖僧
惠金楊惠紅羅女等剪紙撒豆成兵曹單濮陽諸郡邑所

在騷然撫臣檄鶴齡勦之輒伐山通道身先士卒賊善飛
刀取人一日臨陣幾爲所中乃用火攻下之擒楊惠等平
其寨按臣與撫不協劾撫不能先期解散鶴齡功遂不錄
惟轉參藩時年四十父母在堂遂拂衣還

海寧
州志

程立綱字國振號合川臨安人幼失怙事母孝才行超越
嘉靖間任湖廣勛陽上津縣尉多奇績時都御史至勛陽
綱大治舟筏人莫知其故越日洪水驟至都御史乘舟居
民乘筏卒賴以濟至今有程公渡立祠以祀勛陽寇起都
御史知綱才命往平之綱單騎詣寇諭以威德降者數千
人都御史論功題請綱固辭不居乞養致仕

萬曆臨
安縣志

吳玘字汝瑩錢塘人嘉靖進士拜行人歷廣東布政司參政蒐士卒立保伍明法令察盜出沒而芟除之境以大寧連寇作督師征之殺二千餘人降千餘人清遠峽險而多盜以卒六百人鑿山三十里爲梁二十有一舟用得挽以濟籍民舟之可航海者什伍爲綱紀約寇至共擊之海寇頓輯玘固知兵更習吏事會有事安南治益勤以贏卒舊錢

塘縣志

馮覲字晉叔海寧人嘉靖進士職方郎中庚戌之事覲守西直門撫軍詰奸威令整肅轉武選歷陞廣東左參政行部樂昌猝遇徭賊橫掠從者皆走覲獨衣冠端坐賊輿之

入巢求犒覲正色曰若不知馮參政耶安得犒賊乃復興
覲出駐韶州覲于入巢時已窺其要害尋集勁卒千人出
不意問道襲之遂獲巨魁俘其黨百餘以出事聞擢按察

使

海寧
縣志

顧言字子行仁和人嘉靖進士知惠州府島寇交訐言知
千戶王招才勇授以方略擒殺賊李烏蛇李文冲及其黨
千餘人願爲農者釋之時又有花腰蜂等三千餘人流劫
鄉鎮言圖畫進軍機宜山川險隘爲書曰惠陽圖說上之
軍府請調發時以潮寇爲急兵力未能及惠言乃令辨士
入賊巢陳說利害賊感悔悉降歷遷雲南按察使萬歷五

年以貴州左布政致仕歸

浙江通志

郭孝字可忠仁和人嘉靖進士任刑部主事歷湖廣僉事
備兵惠潮嶺表盜賊充斥巨寇曾一本林道乾爲之魁巨
艦乘風出沒波濤間孝至大修戰具遣人諭以禍福道乾
倒戈降而一本獨頑梗不受撫因檄閩廣兵尅日大舉孝
親執枹鼓立矢石間士氣百倍遂大破之一本遁去調河
南再遷江西副使分巡饒南饒襟帶長江洪濤千里盜賊
剽掠行旅苦之孝增置戰艦星布要津賊卽受捕江道遂
清嘗獲礦盜數百人悉杖而遣之曰此貧乏者求延旦夕
耳不以功聞也尋轉福建左參政過莆陽環視城形三面

平曠東南外擁高山城俯接其下孝曰此窳竇也增闢城

址圍其山于城中陞貴州按察使致仕歸

仁和縣志

朱澍字平川海寧人嘉靖中由明經授欽州判官攝州事

欽當安南門戶邊寇黃邦相者乘交趾亂掠境內民騷動

澍奮呼募民爲兵汰其不用命及逋逃者誓死守衆大和

集戎勿妄動一日賊衆卒至澍方巡城正色呵之曰若等

揚言恢復轉掠無狀將干天討戮及父母妻子無爲也賊

弭首將引退時議欲乘之不許旣而中丞以雷廉郡兵屬

焉乃召時羅峒長黃子璟等授以方畧出奇夾擊擒賊渠

擢知高明縣乞養歸

馬三才撰
朱澍傳

鮑奇英本新安人家于杭遂隸籍焉智勇兼備嘉靖甲寅
總制胡宗憲求才英以文諸生改辟武弁宗憲嘗坐中堂
見英立階下紅光四映及召至堂上了然無異宗憲奇其
人舉授守府俾以鎮撫塘棲時倭寇徐海等引衆數萬由
海寧數掠其境英以忠勇自許身先士卒屢戰有功擢留
守叅府以勞瘁卒于官

鮑氏
家乘

李香字蘭臺其先寶坻人世有軍功祖錦襲指揮使嘉靖
元年調外省遂居仁和東城父麒指揮僉事香生時有異
香故以爲名比長猿臂善騎射豐準美髯雙眸顧盼威稜
動人中武榜萬歷十六年授湖廣大圍山守備擢鳳陽府

留守叅將賜一品服出鎮朝鮮爲都使宣布朝廷威德備
日本亂三年撤還授定海總兵官香事後母孝遇異母弟
尤篤愛旣仕遠方所有田業悉其弟董之歸而弟報以空
籍香取籍焚之一無所問有三姪業儒貧不能自給爲買
石墩田數十畝與之年八十一卒次子茂玉爲郡諸生篤
于孝友好宋儒性理書絕意進取每救人于災發粟賑施
萬歷三十三年大旱茂玉開義井至今賴之

仁和縣志

江鐸字士振仁和人萬歷進士授刑部主事出守福州歷
陞山西參政晉按察使會播酋楊應龍反于蜀朝議擢鐸
僉都御史巡撫偏沅時總督李化龍分八道進兵川師四

路黔師三路鐸統楚師次黃沙岡一路分兩翼由白泥龍
泉夾攻板角關破之再進破瑪瑙長坎保子等岡奪楷木
關進屯青蛇岡遂入三渡關乘勝直抵海龍岡海龍于諸
險中爲最賊負嵎時暑雨甚聚箐中多重嵐毒霧師深入
而餉不繼鐸改長運爲接運每三十里設營置運卒數千
前運未行後運已束載而待士乃宿飽破土月二城應龍
自縊論功廕一子世錦衣指揮洞蠻皮林在湖貴交與九
股苗相接有吳國佐者洪州司特洞寨苗也桀黠無賴通
漢語略知文義素往來諸苗洞習其酋酋咸推服之遂反
合其黨石纂太攻上黃堡敗叅將黃冲霄縱掠屯堡七十

餘時方征播未暇討旣平播鐸移駐靖州命總兵陳璘率副將李遇文等七道以進擒苗酋銀貢等攻破特洞焚之國佐逃天浦追獲之石纂太逃廣西上巖山指揮徐時達誘縛之賊黨楊永祿率衆萬餘屯白冲遊擊沈宏猷等夾攻生擒永祿諸苗悉平初鐸語諸將曰皮林外有衢內有險諸苗營窟甚固非先以文告解散凶黨則渠魁未可旦夕平也下令禁妄殺開招撫明賞格戒騷擾逮進攻又嚴禁各軍之殺奪者以是諸苗歸順易以成功旋以勞疾歸

卒贈兵部右侍郎

舊仁和縣志

洪瞻祖字詒孫鍾曾孫也萬歷進士由庶吉士爲兵科給

事中烏江當貴播之界南岸則烏江關循江而下北屬播
南屬貴水西稍侵界土總督王象乾責水西退出所侵地
欲以爲功瞻祖謂安氏二百年來與流官無異其兵則勇
冠諸苗其人則輒而戀主其地則滇南門戶督臣何故爭
之且沙溪撮土所爭幾何全播之間得不償失智者不爲
也神宗以兵科議是會延綏總兵麻承恩陳璘納賂兵部
尚書有所收授瞻祖疏劾本兵通賊私污廷議首輔沈一
貫不能庇乃得罪去中察典補嘉定丞擢南行人副使陞
右都御史巡撫南贛時閩廣駐賊匿深箐中官兵多失利
瞻祖檄諸郡兵分路合勦身歷蠻瘴中越嶺渡汀冒矢石

執桴鼓斬賊渠了婆等二千餘人燬員子山等三十餘巢
奪還男婦牛馬器械無算四省合奏其功而瞻祖已乞骸
歸家居四十餘年卒

浙江通志

陳九思本姓鐵始祖鐵堅爲守和州以城降明太祖賜姓
陳世襲杭州前衛百戶九思初爲諸生擲筆謝去萬歷間
襲父職又以武科爲吳淞叅將以禦倭功陞副總兵特遷
左府都督僉事九思在吳淞時時操小舟出沒三江間輒
獲巨盜倭勢張以沿海亡命爲窟穴九思悉擒而戮之轅
門與倭大戰殲厥渠魁斬獲無筭江南勲衛子弟多裘馬
自喜如九思綽有名將威畧者殆無兩也

浙江通志

按九思其先世鄧州人自襲杭州衛百戶遂隸籍焉萬
歷錢塘志稱錢塘人

汪文治臨安人有肝膽驍勇絕倫歷湖廣武崗司守備率

兵勦賊屢建奇功封義勇將軍

臨安縣志

許士奇字稚正海寧人萬歷癸丑進士授黃州推官地多
盜士奇至悉裁以法聞風屏迹累遷州南道副使時奢崇
明雖敗蘭州酋尚倚水西爲犄角士奇監將吏練士馬築
城與屯出入行間二年闢地千里斬賊數千蘭酋據險盡
古箐中改其山曰鳴鳳構宮殿陡峻不可攻士奇構離黨
與遂破其巢殄滅之朝錄擢穴功擢臬湖廣再遷右布政

使備兵松潘未任改西寧言者忌之中以考功法罷歸

清寧

縣志

盛本一字子元於潛人萬歷選貢授山東平度州同知刺盜劉鳳鸞兄弟五人久爲州患本一聽其四掠故弗救密遣心腹投賊遂設伏要害獲鳳鸞等餘衆悉就撫老稚羅

拜曰十年之寇賴公殲于一且因立石頌功

於潛縣志

金聲振字慕周於潛人有勇畧萬歷十五年撫軍聞其才辟署把總備倭定海有功題敘叅撫年七十猶躍馬橫槊

思沒王事致仕林居十餘年卒

於潛縣志

陳起龍字雲從富陽人崇正進士授建昌府推官累擢福

建布政司叅政分守漳南時賊首江世英等往來剽掠漳
潮間起龍修理城具選練精銳全郡恃以無恐未幾雲霄
撫寇告警起龍單車赴之及至浦城賊已據盤陀嶺起龍
曰險易未習宿衛未周法當先守後戰乃分隊登陴四門
懸燈布列率先週巡三晝夜口不嘗殮目不交睫賊勢不
支其首徐連等鳩黨數百乞撫起龍度此屬忽撫忽叛法
在不赦審其桀驁者盡斬之諸寇悉平

富陽縣志

毛文龍仁和人以都司援朝鮮遂授總兵累加至左都督
掛將軍印賜尚方劍設軍鎮皮島皮島亦謂之東江在登
萊大海中綿亘八十里不生草木文龍籠絡其民爲兵分

布哨船聯接登州以爲犄角計袁崇煥嘗疏請遣部臣理
餉文龍惡文臣監制抗疏駁之崇煥不悅及文龍來謁接
以賓禮文龍又不讓崇煥謀益決至是遂以閱兵爲名泛
海抵雙島文龍來會崇煥相與燕飲至夜分文龍不覺也
崇煥議更營制設監司文龍怫然崇煥以歸鄉動之文龍
曰向有此意但惟我知東事崇煥益不悅以六月五日邀
文龍觀將士射先設幄山上伏甲幄外文龍至其部卒不
得入崇煥因詰文龍違令數事文龍抗辯崇煥厲色叱之
命去冠帶繫縛取尚方劍斬之帳前以其狀上聞言文龍
大將非臣得擅誅謹席藁待罪帝驟聞意殊駭念旣死且

方倚崇煥乃優旨褒答

明史袁崇煥傳

許當俊餘杭人崇正間由吏員任廣東曲江縣主簿值流寇圍城據帽頂山俯瞰城中俊遣壯士斫其營一鼓奪之賊善妖術城門忽自開俊急撤屋材沿城樹柵賊不得入又詗知賊間在城啖以重利使反爲我用誘賊首近城取賞伏壯士出擒之賊計沮解圍去曲江以全巡撫張鏡心上其功陞惠州經歷

餘杭縣志

潘欲昇字寅日昌化人明末盜起邑令李人龍部良家子討之辟欲昇爲大都正資其策賊平全活甚衆歲飢捐錢

粟以賑

昌化縣志

國朝

吳六奇號葛如少落拓不事家人產明季從戎委守豐順
殲山寇

王師定粵六奇中路迎謁率衆景附授總兵官開闔饒平會土
寇江龍踞大埔鄭儼據湯坑六奇悉討平之順治十年潮
鎮郝尚久叛各鎮多從六奇抗不肯附攻甚力潮旣恢復
紀功獨多

特詔褒美賜蟒貂刀馬等物以左都督加太子少保六奇在潮修
府庠建明倫堂又建饒平大埔兩學及置鳳城驛太平公
館卒贈少師謚順恪

廣東通志

六奇海陽籍本海寧人

浙江通志

汪起龍字雲舉婺源人仁和籍崇正丁卯與父大倫同舉于鄉戊辰成進士喜談兵見國事日非慨然思自見而時輕武弁數上書不報

國初授遊擊將軍防禦松城松固海濡也盜艘出沒爲民患起龍葺城塹給芻粟平物價息訟端通工惠商痛懲騷掠松民德之爲立碑

仁和縣志

霍時御字維翰仁和人幼抱奇畧屢有戰功守備漳南初至任力戰城外積尸以萬計時御倡募掩埋漳危困米價至五百金一斛富家積貯者皆以易金珠時御獨散米賑饑全活甚衆漳臨海時多畔逆擒獲立斬當事不之訊也

時御細爲推鞠多所寬釋卒于官

仁和縣志

趙廷標字叔文錢塘人順治三年以諸生從軍除福建永定縣知縣境久藪賊廷標至會迎春東郊廷標覆甲墮間而集諸耆老率兒童伎樂張綵設伏闕闥都以迎賊不疑有備羣趨之覆起掩殺環數十里餘賊散去遷湖廣衡州府同知攝府事督撫共薦遷常保分守道康熙辛丑備兵安普撫變熨諸蠻而寧州彌勒州各土官誘諸蠻反征蠻軍四出以廷標監軍決策行間復故時維摩地安慰巴盤八甸間諸蠻以寧調廣東廣肇南韶道川湖兩廣八排嶺諸寇聞廷標至立解連州寇起鎮臣以勦捕方畧委之廷

標諸寇聞廷標至亦卽就撫補長沙鹽驛道先是長沙陷賊甫恢復軍書旁午一切芻茭械仗舟師竿役征徭去來者絡繹于路廷標砥力辦給不悞晷刻因併理糧儲道事康熙戊辰遷陝西糧儲道以病牒上會武昌兵變羽書來湘潭廷標強起視事晝課儲峙夜巡警以防竊發累月病甚旬歸卒于家

錢塘縣志

按廣東通志及湖廣通志俱載廷標政績最著在粵時盜聞其名輒遁去舊有分巡使者柴薪錢屏不受分給貧弱無告者又在楚接士以禮御民以慈除鹽務漕糧相沿夙弊每行部至衡父老子弟咸曰慈父至矣其令

人畏愛如此蓋循吏而兼武略者也

高三位字最公於潛人幼習騎射力止奔馬順治三年天
目寇發邑舉練總值遊僧隱元等率黨萬餘寇縣三位單
騎衝擒之賊悉潰守邑十餘年邑人倚爲長城

於潛縣志

趙吉士字天羽號恒夫休寧人仁和籍順治辛卯舉人知
交城縣交城居萬山中巖磴參錯畜馬絕有力又饒灌木
時民間畜馬有禁上官廢南堡村木版許汾河市賣由是
利爲文水商民所奪交人重困往往去爲盜吉士至完解
舍垣墻詢羣盜出沒申明乘墉保甲團練之法躬詣河北
都行荒政相度蹊徑知最險者三坐崖東西兩葫蘆川繞

其下塞葫蘆口則軍不得進據三坐崖則軍不克登遂默識之會上官檄進勅吉士令葺靖安堡先七日置酒城隅却月湖張樂于舫許老稚夾岸縱觀越宿復要客剪燭賦詩密誠司夜者促更籌于子刻打五鼓吉士起送客出郭則守備姚順等已統步騎兵四百集南關外疾行四十里襲士卒水泉灘分三隊並進入兩葫蘆川據三坐崖賊鳥獸散且戰且奔官軍分搜巢窟獲魁渠二十二人餘或降或自剄召山民不作賊者三十七家資以羊酒其素不當夫徭者千四百三十家編其籍入都圖入山旬有六日交山寇平又修圖經立倉廩定軍營課民種柳鑿山通龍門

渠以溉田遂力請復南塋村木版秣善馬于驛徵入爲戶

部山西司主事

山西通志

權開揚州任滿擢戶科給事中無何

以籍貫註誤降補國子監學政遂致仕

錢塘縣志

王玉璧字楚珩仁和人武鄉試第一順治壬辰會試復第一殿試第一甲第一授福建都督僉事時海寇屯漳攻泉州興化屬邑惠安同安告失而漳之南靖長泰漳浦詔安四縣先陷于賊玉璧復惠安同安解泉州圍隨從提督恢復漳城并四縣玉璧以諸邑淪陷且漳城兵燹之餘傾廢已盡請免諸邑罪民以築城海寇復突陷閩安鎮直逼省城巡撫宜永貴命玉璧偕撫標分頭堵禦帶兵不滿三百

出奇力戰用大砲破賊木城于西城龍腰斬奪雲梯生擒
賊首楊炯韓泰等賊遁去而城獲全陞陝西延綏定邊都
督同知調天津衛總兵致仕家居三十年年九十卒

浙江通志

趙蒼璧字晉襄號圓菴錢塘人康熙壬戌進士官江西道
御史初令麻城值夏逢龍之變民多震恐圓菴曰麻邑楚
豫門戶也不可不預爲計遂集紳士募鄉勇儲糧草堅壁
以守賊聞其有備卽馳去爾時楚邑多侵掠而麻城獨全
者圓菴之力也守邑時嘗月夜巡城作五律一章流傳江
浙和者甚衆真定梁公交章薦蒼璧遂擢陞侍御益以清
勤自矢所居四壁蕭條敝衣布履有貧士所不堪者卒年

五十有八

武林耆舊續志

王祚昌字引桐仁和人以武進士爲福建水師守備從兵科張學禮冊封琉球時海氛未靖中途屢遇寇盜擊敗之往返得無恙擢烽火營遊擊康熙二十二年提督施琅檄從征臺灣攻入罩澳斬數十級進攻澎湖琅分兵爲八隊令祚昌獨當一隊率水陸兵進擊賊舟橫列水隘鷁首置大砲轟聲如雷祚昌以鳥船先衝賊陣飛火矢石雨集夾身而下祚昌瞋目大呼賊披靡諸船相繼進衝祚昌中三矢左足傷砲石不爲動搏賊益厲射僞都督林陞殪之復焚殺僞將軍等七十餘人琅旣屢勝進攻孃媽官搗賊巢

祚昌復先登陷陣自辰至申焚賊大船三擊沉其船一俘
戮無算遂大捷凱旋加左都督銜終陝西靈州副將

臺灣志